



Galicia e Brasil na década dos 20

Description

O novo marco legal da acción exterior española e galega desenvolve un amplo abano de posibilidades á hora de ordenar e dinamizar a acción exterior autonómica e aproveitar todas as oportunidades dun bo posicionamento internacional. Galicia está preparada para aproveitar ese novo marco, desde a nosa natureza na sociedade internacional, décadas de traballo público e subterráneo de actores variados, así como desde o último ano cun marco xurídico claro, coa Lei galega de Acción Exterior e Cooperación ao Desenvolvemento aprobada en marzo de 2021.

Tendo un capital de relacións internacionais extraordinarias, non é fácil para Galicia escoller esforzos dirixidos e sistemáticos na súa proxección internacional. A identidade galega espállase polo globo e a multiplicidade de expresións valiosas obriga a pensar estratexias, que nos permitan avanzar cohesos cunha intencionalidade manifesta e avaliable, e realista. Parece que precisamos exercicios reais de políticas de acción exterior que acompañen o desenvolvemento normativo dos últimos anos.

Agora que España entrou na Comunidade de Países de Lingua Portuguesa e Galicia é protagonista moi directa desa decisión é tempo de facer e tomar partido e aspirar a unha Autonomía de primeira preparada para o futuro. Brasil, peza simbólica en relación á diáspora e as relacións coa lusofonía é un país prioritario para Galicia, con perfil propio no contexto de América e nas posibilidades de triangulación coa lusofonía.

Coma con tantos outros territorios, a historia entre Galicia e Brasil comeza coa primeira diáspora masiva do S.XIX as Américas e chega até os nosos días despois dun forte impulso coas cadeas migratorias dos anos 60, a globalización e a internacionalización económica desde os anos 90, o turismo ou a propia acción exterior institucional. Mais alá da lingua, a cultura ou o carnaval. Desde os Gobernos de Manuel Fraga, que até tivo representación indirecta en Floriannopolis, as relacións con Brasil multiplicáronse en todas as fronteiras, destacando o económico, o sociocultural e o académico. Sen embargo tamén pode identificarse unha certa liña irregular en canto a solidificación dunha acción exterior coherente no país, que aproveite as redes xa en funcionamento. O feche da Oficina da Rede Pexga (ligada ao IGAPE) é parte tamén dese proceso gaseoso e de aprendizaxe.

Pese aos avances e a multiplicación de vínculos nestas décadas, a acción exterior de Galicia en Brasil, aínda estando viva, compórtase de maneira sectorial e pouco cohesa. É un exemplo privilexiado da desorde da nosa acción exterior e por iso tamén un espazo atractivo para un deseño mínimo ao contar coas posibilidades dun país continente na América da nosa diáspora, onde tamén está Cuba, México, Venezuela, Arxentina e Uruguai. Son estes países, fóra de Europa, os que manteñen as nosas exportacións en forma e os que construíron as liñas de exportación galegas ás Américas.

Así a historia e tradición senta as bases para unha renovación da marca Galicia no Brasil e en toda América, que valorice os vínculos culturais e dinamice as posibilidades no económico e no cultural, cunha acción sostida e perdurable no tempo, no que a diplomacia pública e dixital ten moito a facer. O éxito posicionado do Xacobeo, como fenómeno turístico e cultural

global, pode funcionar como idea tractora dunha marca Galicia no Brasil e no conxunto da lusofonía, pero precisamos moito máis. Hai que integrar ao conxunto da nosa acción exterior (do mar á cultura) ademais de con toda a tradición e toda a potencialidade da lingua, con fenómenos renovadores actuais da nosa identidade universal, como as Tanxugueiras ou Ana Peleteiro. A identidade fainos máis competitivos e cooperativos para o mundo do futuro e non debera ofender a ninguén.

No horizonte da década dos 20 e nunha sociedade internacional en tensión, o desenvolvemento da Lei Paz Andrade e unha experiencia modelo no Brasil modernizaría a Galicia global e enriquecería futuras experiencias nas xa densas relacións con Portugal, Cabo Verde, Angola, Mozambique, Bissau... ou Macau na China.

APARTADOSTEMATICOXEOGRAFICOS

Acción exterior de Galicia

ETIQUETAS

Brasil Galicia internacional

IDIOMA

Galego

INVESTIGACION

Paradiplomacia Observatorio Galego da Lusofonía

Date Created

Marzo 10, 2022

Meta Fields

Autoria : 3782

Datapublicacion : 20220310